

आकाशवाणी रायपुर (छत्तीसगढ़)
प्रादेशिक समाचार (छत्तीसगढ़ी)

1810 गुरुवार

15.01.2026

प्रमुख समाचार –

- 1- बीजापुर जिला म आज इक्कीस झिन माईलोगिन समेत बावन झिन माओवादी मन ह करीन आत्मसमर्पण।
- 2- राष्ट्रीय गीत वंदे मातरम के एक सौ पचासवां वर्षगांठ म आज रायपुर लोकसभा क्षेत्र म करीबन पांच लाख पढ़ईया लइका मन करीन वंदे मातरम के सामूहिक गायन।
- 3- सराफा एसोसिएशन ह छत्तीसगढ़ म बुर्का या नकाब पहिन के अउ घूंघट ओढ़के गहना के खरीदी उपर लगईन रोक।

माओवादी-आत्मसमर्पण

बीजापुर जिला म आज इक्कीस झिन माईलोगिन समेत बावन झिन माओवादी मन ह आत्मसमर्पण करे हे। जिला के पुलिस अधीक्षक डॉक्टर जितेन्द्र यादव ह बतईन कि शासन के पुना मारगेम पुनर्वास अउ आत्मसमर्पण नीति ले प्रभावित होके ए जम्मां माओवादी मन ह आत्मसमर्पण करे हे। ओमन ह बतईन कि एखर मन उपर कुल एक करोड़ इकतालीस लाख रूपिया के इनाम राखे गे रिहीस ए माओवादी मन म डीवीसीएम, पीपीसीएम, एसीएम, प्लाटून कमांडर, मिलिशिया सदस्य जउ जनताना सरकार ले जुड़े पदाधिकारी मन सामिल हरय। आत्मसमर्पण करइया सबो माओवादी मन ल राज्य सरकार के पुनर्वास नीति के चलत पचास-पचास हजार रूपिया के प्रोत्साहन रासि दे गेहे।

दुर्ग-स्टार्टअप समारोह

दुरूग जिला म आज ले राष्ट्रीय स्टार्टअप समारोह ह सुरु होगे हे। तीन दिन तक चलइया ए कार्यक्रम ल डिस्ट्रिक्ट इन्क्यूबेशन हब अउ जिला प्रशासन ह करत हे। ए कार्यक्रम के उद्देश्य नवाचार ल मजबूत करके बाजार ले जोड़ना अउ जवान लइका मन ल एखर बर प्रेरित करना हवय।

डिस्ट्रिक्ट इन्क्यूबेशन हब के संचालक अउ टाटा इंस्टीट्यूट फाउंडेशन के प्रोग्राम मैनेजर समीरान मित्र ह बतईन कि ए ट्रेनिंग सेंटर म नवा उद्योग ल स्थापित करे के प्रसिक्षण दे जात हे अउ नवाचार ल तैयार करे म मदद करे जात हे। एखर बर जरूरी शासकीय दस्तावेज के संगेसंग पंजीयन ल केन्द्र कोति ले सहयोग दे जाथे।

कार्यक्रम के बेरा लगे प्रदर्सनी म घरेलू सामान, साज-सज्जा के सामान अउ खाय-पीये के सामान के संगेसंग बिजली वाले गाड़ी ले जुड़े नवाचार ल देखाय गेहे।

बुर्का/नकाब-प्रतिबंध

सराफा एसोसिएशन ह छत्तीसगढ़ म बुर्का या नकाब पहिन के अउ घूंघट ओढ़के गहना के खरीदी उपर रोक लगा देहे। सराफा एसोसिएशन के अध्यक्ष कमल सोनी ह बतईन कि मास्क, हेलमेट, बुर्का, अउ नकाब पहिन के अवइया ग्राहक मन ल दुकान म अंदर आय बर नइ दे जाही। ओमन ह बतईन कि गरियाबंद जिला के नवापारा-राजिम म पाछु दिन एक ठिन गहना दुकान म होय एक करोड़ रूपिया के सोन-चांदी के जेवर के चोरी के बाद ए फइसला ले गेहे।

जानबा के अनुसार एखर ले पहिली बिहार, राजस्थान, उत्तरप्रदेश अउ झारखंड म अइसने रोक लगा जा चुके हे।

विधि विभाग-वेबसाइट

विधि अउ विधायी कार्य विभाग के मंत्री गजेन्द्र यादव ह आज विभाग के नवा अधिकारिक वेबसाइट के सुभारंभ करीन। चिप्स कोति ले तैयार करे गे ए वेबसाइट के माध्यम ले उच्च न्यायालय, महाविधिवक्ता कार्यालय, जिला न्यायालय, ट्रिब्यूनल अउ राजस्व न्यायालय ले संबंधित प्रक्रिया के जानकारी मिल सकही। संगेसंग आम लोगन मनके जानकारी बर कानून ले संबंधित अधिनियम, अधिसूचना अउ नियम ल अपलोड करे जाही। संगेसंग केन्द्र सरकार के सबो विधि संबंधित वेबसाइट अउ पोर्टल के लिंक घलो ए वेबसाइट म रइही।

जगदलपुर-युवा संसद

जगदलपुर स्थित शहीद गुण्डाधूर कृषि महाविद्यालय म आज संभाग स्तरीय युवा संसद कार्यक्रम करे गीस, जेखर सुभारंभ बस्तर सांसद महेश कश्यप ह करीन। ओमन ह जवान लइका मनके संसदीय ज्ञान अउ कार्यक्रम के चलत उंखर प्रदर्शन के तारीफ करीन। श्री कश्यप ह कहिन कि अइसना कार्यक्रम भावी पीढ़ी ल लोकतांत्रिक प्रक्रिया ल समझे के एक ठिन अच्छा अवसर देथे।

बालोद-जी राम जी अधिनियम

बालोद जिला के ग्राम पंचायत भेजामैदानी म दू सौ बयासी श्रमिक मन ह मानव श्रृंखला बनाके लोगन मन ल विकसित भारत – जी राम जी योजना के बारे म जारूगक करीन। उहां उपस्थित लोगन मन ल बताय गीस कि ए योजना के चलत हर ग्रामीण परिवार ल हर बछर एक सौ पच्चीस दिन के मजदूरी के गारंटी दे गेहे। उहें, काम के मांग म पन्द्रह के भीतरी रोजगार नइ मिलय म बेरोजगारी भत्ता मिलही। विशेष ध्यान, जल सुरक्षा, ग्रामीण बुनियादी ढांचा, आजीविका सृजन अउ जलवायु परिवर्तन ले जुड़े काम म होही।

वंदेमातरम-सामूहिक गायन

राष्ट्रीय गीत वंदे मातरम के एक सौ पचासवां वर्षगांठ के मउका म आज रायपुर लोकसभा क्षेत्र म करीबन पांच लाख पढ़ईया लइका मन वंदे मातरम के सामूहिक गायन करीन। एमा रायपुर लोकसभा क्षेत्र के करीबन तीन हजार विद्यालय, महाविद्यालय अउ विश्वविद्यालय के विद्यार्थी मन सामिल होइन। ए मउका म मुख्य कार्यक्रम राजधानी रायपुर के सुभाष स्टेडियम म आयोजित करे गीस, जेमा करीबन दस हजार विद्यार्थी मन ह प्रत्यक्ष रूप ले अपन सहभागिता करीन अउ वंदेमातरम के सामूहिक गायन करीन। आने-आने विद्यार्थी मन ह अपन-अपन स्कूल अउ कॉलेज के परिसर म सामूहिक रूप ले वंदेमातरम के गायन करीन।

राजधानी रायपुर म राखे गे कार्यक्रम म उच्च शिक्षा मंत्री टंकराम वर्मा, तकनीकी शिक्षा मंत्री गुरु खुशवंत साहेब, लोकसभा सांसद बृजमोहन अग्रवाल, महापौर मीनल चौबे अउ छत्तीसगढ़ साहित्य अकादमी के अध्यक्ष शशांक शर्मा समेत आम लोगन सामिल होइन।

खनिज सचिव-पीसी

खनिज संसाधन विभाग के सचिव पी. दयानंद ह आज रईपुर म होय एक ठिन पत्रकारवार्ता म बतईन कि छत्तीसगढ़ ह लीथियम खदान के नीलामी करे वाला देस के पहिली राज्य बन गेहे। केन्द्र सरकार कोति ले कोरबा जिला के कटघोरा तहसील के अंतर्गत लीथियम अउ दुर्लभ खनिज के नीलामी करे गेहे। प्रदेश के सुकमा अउ बस्तर जिला के डेंगपाल-एलिंगनार क्षेत्र म लीथियम, नियोबियम, टैन्टेलम अउ आर.ई.ई. खनिज के खोज बर राष्ट्रीय खनिज अन्वेषण ट्रस्ट-एन.एम.ई.टी. के चलत एक परियोजना स्वीकृत करे गेहे। श्री दयानंद ह बतईन कि ओ खनिज जउन के देस के आर्थिक विकास, राष्ट्रीय सुरक्षा अउ तकनीकी प्रगति बर जरूरी हवय, ओखर अन्वेषण काम सीएमडीसी के मदद ले करे जात हे। एखर चलत

बलरामपुर म मैग्नीज अउ ग्रेफाइट के अन्वेषण बर कोल इंडिया लिमिटेड अउ छत्तीसगढ़ मिनरल डेव्हलपमेंट कार्पोरेशन के बीच समझौता ज्ञापन म हस्ताक्षर करे गेहे ।

खनिज सचिव ह बतईन कि पाछु दू बछर म राज्य सरकार ह अनुसूचित जाति वर्ग के लोगन मन ले टिन के ऑनलाइन खरीदी बर एक ठिन पोर्टल तैयार करे हे, जेखर ले ऑनलाइन भुगतान करे जात हे। सरकार के ए कदम ले अनुसूचित जाति वर्ग के लोगन मन ल तीन गुना जादा पइसा मिलत हे। श्री दयानंद ह खनिज विभाग कोति ले अवइया दू बछर म होय वाले काम के बारे म घलो बतईन।

ओमन ह बतईन कि राज्य सरकार कोति ले खनिज ब्लॉक तैयार करके नीलामी अउ अन्य माध्यम ले खनन करे जात हे, जेखर ले पाछु दू बछर म राजस्व ह बड़का बाढ़े हे। दिसंबर दू हजार पच्चीस तक खनिज ले राज्य सरकार ल लगभग दस हजार तीन सौ पैतीस करोड़ रुपिया के राजस्व मिले हे। वित्तीय बछर के आखिरी तक राजस्व बर सत्रह हजार करोड़ रुपिया के लक्ष्य राखे गेहे।

तातापानी महोत्सव

बलरामपुर जिला म चलत तातापानी महोत्सव के दूसर दिन आज पंच-सरपंच सम्मेलन के आयोजन करे गीस। एखर संगेसंग कृषक संगोष्ठी घलो होइस। काली मुख्यमंत्री विष्णुदेव साय ह ए कार्यक्रम के सुभारंभ करे रिहीन। महोत्सव के पहिली दिन राज्य के प्रसिद्ध कलाकार अउ विधायक पद्मश्री अनुज शर्मा ह अपन दल के संग छत्तीसगढ़ी लोकगीत के प्रस्तुति दीन। एखर अलावा जिला के कतकोन विद्यालय अउ महाविद्यालय के पढ़ईया लइका मन ह घलो सांस्कृतिक कार्यक्रम प्रस्तुत करीन। ए मउका म राज्य के कृषि मंत्री रामविचार नेताम ह घलो उपस्थित रिहीन।

संक्षिप्त समाचार

— प्रदेश म अवइया फरवरी महीना म होय वाले खेलो इंडिया राष्ट्रीय जनजातीय खेल प्रतियोगिता के प्रचार-प्रसार बर निकाले गे मशाल गौरव यात्रा ह बालोद पहुंचीस, जेखर कलेक्टर दिव्या उमेश मिश्रा ह स्वागत करीन।

— बलौदाबाजार कलेक्ट्रेट परिसर म आगजनी अउ तोड़फोड़ के मामला म छत्तीसगढ़ क्रांति सेना के पदाधिकारी अउ जोहार छत्तीसगढ़ पार्टी के प्रदेश अध्यक्ष अमित बघेल ल गिरफ्तार करे गेहे।

— वरिष्ठ पत्रकार कुंजबिहारी साहू के सुरता म जांजगीर-चांपा जिला के खरौद म होय प्रतिभा सम्मान समारोह म बारह जिन प्रतिभावान पढ़ईया लइका मन ल सम्मानित करे गीस।

— महासमुंद के सरायपाली विकासखंड के अंतर्गत बालोदिया स्थित राईस मिल म इकसठ हजार बोरा ले जादा धान के कमी पाय जाय म राईस मिल म उपलब्ध पूरा धान अउ चाउर के स्टॉक ल अनुविभागीय अधिकारी कोति ले जब्त कर ले गेहे।

